

Lawatan Ikatan Ahli Arkeologi Malaysia ke Sumatera

oleh

AHMAD HAKIMI KHAIRUDDIN, M.A.

Sekumpulan ahli-ahli IAAM memulakan lawatan mereka ke Sumatera dengan menaiki pesawat Pelangi ke Padang pada pagi 24 Mei 1992. Kumpulan kami yang berjumlah empatbelas orang terdiri daripada Prof. Dr. Nik Hassan Shuhaimi (Ketua rombongan, serta isterinya, Puan Salmah bt. T. Chik, Encik Jazamuddin bin Baharuddin, Haji Wan Rusik, Tuan Haji Abdul Hamid bin Zamburi, Encik Ahmad bin Harun, Encik Mohd. Yusof Abdullah, Encik Abdul Jalil Osman, Encik Khamis Baba, Encik Mukhtar bin Ahmad serta isterinya Puan Nor Intan Abd. Samad, Encik Che Mahzan Ahmad, Tuan Haji Mohamad Ali Zakaria dan Ahmad Hakimi bin Khairuddin.

HARI PERTAMA

Kami tiba di tanah Sumatera lebih kurang 55 minit kemudian apabila pesawat kami mendarat di Bandarudara Simpang Tiga, Pekan Baru. Kami melalui pemeriksaan imigresen sebelum menyambung perjalanan kami ke Padang.

Bandarudara Tabing, Padang

Apabila kami mendarat di Bandarudara Tabing, Padang pada pukul 11.02 (Waktu Malaysia), rombongan kami di sambut oleh beberapa orang pegawai dari Departemen Pendidikan dan Kebudayaan Propinsi Sumatera Barat dan Muzium Negeri Provinsi Sumatera Barat "Adhityawarman". Kami dibawa dalam tiga buah van ke rumah makan Serba Nikmat untuk makan tengah hari. Jamuan tersebut telah disediakan oleh Bapak Boestami.

Sesudah jamuan tersebut rombongan kami bertolak ke Bukit Tinggi, diiringi oleh Bapak Syafril, Djurip dan Endri. Oleh kerana perjalanan kami ke kawasan tanah tinggi, cuaca menjadi dingin.

* Penulis adalah Pensyarah di Jabatan Pengajian Melayu, Universiti Malaya.



Bapak Drs. Boestami sedang memberi ucapan di Jamuan Makan Tengahari di Rumah Makan Serba Nikmat.

Pusat Dokumentasi dan Informasi Kebudayaan Minangkabau (PDIKM), Padang Panjang

Rombongan kami berhenti sebentar untuk mengunjungi Pusat Dokumentasi dan Informasi Kebudayaan Minangkabau di Padang Panjang. Selepas itu kami dibawa melihat sebuah tempat membuat songket di Kampung Pandai Sikek.

Bukit Tinggi

Kami selamat sampai ke Bukit Tinggi pada jam 3.30 (waktu tempatan atau waktu Sumatera Barat). Kami singgah sebentar di pusat membeli-belah di sana untuk pembelian "souvenir" sebelum membuat "check-in" di Hotel Sari Bundo. Selepas makan malam di rumah makan, 'Famili' sebahagian daripada rombongan menonton persembahan kebudayaan Minangkabau dan yang lain dibawa melihat bandar Bukit Tinggi.

HARI KEDUA

Sianok Canyon

Selepas sarapan pagi, rombongan kami memulakan perjalanan ke Solok. Sebelum meninggalkan Bukit Tinggi, kami berhenti seketika untuk melihat salah sebuah "Objek Wisata" yang menarik, "Sianok Canyon".

Struktur Megalitik di Guguk

Dalam perjalanan ke Solok, kami telah mengikuti jalan yang jauh sedikit, melalui Payakumbuh. Tujuan kami mengikut jalan ini adalah untuk melawat

beberapa struktur megalitik yang terdapat di Guguk. Struktur-struktur ini dijaga oleh tuan punya sebuah kedai yang terletak di sebelah kiri kawasan ini.

Kompleks Menhir Belubus

Dari Guguk, perjalanan kami menghala ke Barat dan Selatan supaya kami dapat berhenti di “situs (tapak) purbakalaan” Balubus yang merupakan satu kompleks “menhir” atau batu hidup. Kebanyakan daripada “menhir” di sini menggunakan hiasan yang bermotif. Salah satu daripada motif yang sering dijumpai di sini ialah motif keluk paku.

Batu Sangkar

Kami meneruskan perjalanan kami ke Batu Sangkar. Setiba kami di Batu Sangkar, kami berhenti untuk makan tengahari sebelum kami melawat “Kantor (Pejabat) “Kepala Suaka Peninggalan Sejarah dan Purbakala Propinsi Sumatera Barat dan Riau”. Rombongan kami disambut oleh “Kepala Kantor”, Bapak Surya Helmi. Beliau memberikan taklimat mengenai struktur organisasi, selepas taklimat tersebut, Bapak Surya Helmi membawa kami melihat “situs-situs purbakalaan” di sekeliling Batu Sangkar.

Batu Bersurat Adithyarman

Tempat pertama yang kami lawati ialah situs purbakalaan yang sedang dalam pembinaan. Prasasti Bukit Gombak merupakan salah satu daripada objek-objek yang dipamirkan di sini.



Batu Bersurat Adithywarman

Perkuburan Istana Rajo, Pagar Ruyong

Di perkuburan Istana Rajo rombongan kami melihat beberapa batu nesan yang menggunakan motif keluk paku yang agak serupa dengan menhir-menhir di Balubus. Di sini terdapat juga satu batu nesan yang menggunakan motif keris.

Istana Si Lindung Bulan

Istana Si Lindung Bulan merupakan sebuah rumah Minangkabau tradisional yang dibina oleh orang kaya di sana. Di hadapan rumah ini terdapat dua struktur kecil yang secara tradisionalnya diisi oleh beras untuk kegunaan orang pedagang (Si Bayan-Bayan, di sebelah kiri) dan orang rumah (Si Tinjau Laut, di sebelah kanan).

Istana Pagar Ruyong

Untuk masuk ke dalam Istana Pagar Ruyong, kami terpaksa meninggalkan kasut kami di bawah. Rombongan kami telah menaiki tangga untuk sampai ke bilik di atas sekali. Seluruh bahagian atas dan dinding bilik ini telah diukir dengan motif-motif yang berlainan.

Prasasti Saruaso I

Selepas melawat Istana Pagar Ruyong, rombongan kami telah dibawa ke Desa Sungai Emas di Kecamatan Tanjung Emas untuk melihat Prasasti Saruaso I.

Prasasti Saruaso II dan Kuburajo Lima Kaum

Akhir sekali Bapak Surya Helmi membawa kami ke Prasasti Saruaso II di Kecamatan Lima Kaum. Disini terdapat juga Kubur Raja Lima Kaum.

Danau Singkarak

Selepas tamat lawatan kami di sekitar kawasan Batu Sangkar, rombongan kami meneruskan perjalanan kami ke Solok. Di dalam perjalanan ini kami telah mengikuti jalan di pinggir Danau Singkarak. Pemandangan di sepanjang jalan ini sungguh cantik sekali.

Solok

Kami tiba di Solok pada waktu petang. Oleh kerana pada keesokan harinya, perjalanan kami ke Jambi dijangkakan akan memakan masa satu hari, rombongan kami telah beristirehat pada waktu yang awal selepas makan malam.

HARI KETIGA

Rombongan kami tertolak pada awal pagi daripada Solok untuk sampai ke Jambi dengan secepat mungkin. Setelah dua hari kami berada di dalam Propinsi Sumatera Barat (Sumber), kami keluar dari Sumber dan memasuki Propinsi Jambi. Kami berhenti di Gunung Medan untuk berehat sebentar sebelum melanjutkan perjalanan kami ke Jambi. Selepas mengisi petrol di stesen minyak Pertamina di Muara Bungo pada tengah

hari, kami menghala ke Muara Tebo untuk melihat Makam Pahlawan Nasional Sultan Thaha Syaifuddin, seorang Sultan Jambi yang menentang pemerintahan Belanda. Kami berhenti sekali lagi di Muara Tembesi untuk makan tengah hari.

Jambi

Apabila kami sampai di Jambi pada waktu petang, rombongan kami telah disambut oleh Kepala Kantor Departemen Pendidikan dan Kebudayaan Propinsi Jambi dan Kepala Muzium yang diketuai oleh Bapak M. Nazir. Mereka menyediakan jamuan petang. Bapak Nazir memberi taklimat sebelum kami dibawa ke tempat penginapan kami di Hotel Marisa. Pada waktu malamnya, pihak Muzium Negeri telah menganjurkan satu majlis makan malam di Hotel Marisa. Kepala Kantor Departemen Pendidikan dan Kebudayaan Propinsi Jambi juga turut hadir bersama isteri di majlis tersebut.

HARI KEEMPAT

Kantor Wilayah Pendidikan dan Kebudayaan, Propinsi Jambi

Selepas sarapan pagi, kami menghadiri satu sesi "dialog" di Kantor Wilayah Pendidikan dan Kebudayaan Propinsi Jambi.

Muara Jambi

Kemudian Bapak Yunus, Kepala Suaka Peninggalan Sejarah dan Purbakala Propinsi Jambi, membawa rombongan kami ke Muara Jambi. Apabila kami sampai ke Desa Keminting Dalam, kami menyeberangi Sungai Kumpeh menggunakan perahu untuk sampai ke Muara Jambi.

Rombongan kami disambut oleh kanak-kanak sekolah yang berdiri dikiri kanan sepanjang jalan ke kawasan percandian Muara Jambi sambil menyanyi dan kibaran bendera. Di hadapan pintu masuk ke kawasan percandian, kami disambut oleh beberapa orang gadis dan menarikan Tarian Sekapur Sireh. Tarian Sekapur Sireh merupakan tarian rasmi Propinsi Jambi. Setelah tarian tersebut tamat, mereka menghulurkan tepak sireh untuk rombongan menikmati sepiaksireh.

Rombongan kami dibawa mengelilingi kawasan percandian oleh Bapak Yunus. Selepas itu jamuan makan tengah hari disediakan sebelum pulang semula ke Jambi. Pada sebelah petangnya, kami mendapat peluang untuk membeli-belah di Jambi.

Majlis Makan Malam di Rumah Gabenor

Kami menghadiri satu majlis makan malam di rumah Gabenor Propinsi Jambi Bapak Drs. H. Abdurrahman Sayoeti. Malangnya Bapak Gabenor terpaksa ke Jakarta untuk menguruskan hal-hal yang tidak dapat dielakkan. Ibu Lily Sharif, isteri Gabenor dan Wakil Gabenor mengambil alih sebagai "host" jamuan tersebut.

Persembahan nyanyian dan tarian menjadi agenda akhir majlis. Tarian-tarian yang dipersembahkan termasuk Tarian Taut, Tarian Kabupaten (daerah) Kerinchi dan Tarian Mandi Taman. Ibu Lily Sharif juga turut



Rombongan disambut dengan tarian Sekapur Sireh oleh gadis-gadis di pintu masuk ke Candi Muara Jambi.

mendengarkan beberapa buah labu termasuk lagu Semalam di Malaysia, Ibu Lily Sharif ini memang terkenal sebagai seorang penyanyi lagu-lagu Minang pada tahun-tahun 1960 dan 1970-an dan telah menghasilkan sebanyak 15 buah album.

HARI KELIMA

Muzium Negeri Propinsi Jambi

Selepas Sarapan pagi, kami melewati Muzium Negeri Propinsi Jambi. Pihak Muzium mengaturkan satu sesi perbincangan selepas lawatan tersebut.

Kami bertolak ke Palembang jam 1.00 petang. Rombongan kami berhenti untuk makan tengah hari di Bayunglencir.

Palembang

Apabila kami sampai di Palembang, rombongan kami disambut oleh pihak Muzium Negeri Propinsi Sumatera Selatan. Malam itu kami menginap di Hotel Puri Indah.

HARI KEENAM

Muzium Negeri Propinsi Sumatera Selatan

Selepas sarapan pagi, rombongan kami membuat lawatan rasmi ke

Muzium Negeri Propinsi Sumatera Selatan. Di sini dua orang pelajar Malaysia yang sedang menuntut di Palembang telah turut mengikuti rombongan kami sewaktu di Palembang. Selepas lawatan tersebut, pihak muzium telah mengadakan satu sesi perbincangan.

Bukit Siguntang

Kemudian kami dibawa melihat Bukit Siguntang. Pada masa lawatan kami, tempat ini sedang dalam proses pembangunan untuk dijadikan satu objek prawisata.

Muzium Sultan Mahmud Badaruddin II

Kami dibawa melawat Muzium Sultan Mahmud Badaruddin II sebelum sembahyang Jumaat. Rombongan kami menunaikan fardhu Jumaat di masjid yang berkedatan dengan muzium ini. Selepas sembahyang Jumaat kami mengambil bagasi daripada hotel dan bertolak semula ke Jambi. Encik Jazamuddin berpisah daripada rombongan kami, menaiki kapal terbang untuk ke Padang. Kami berhenti untuk makan tengah hari di Sungai Lilin.

Jambi

Apabila kami sampai ke Jambi kami menginap semua ke Hotel Marisa.

HARI KETUJUH

Rumah Gabenor

Selepas sarapan pagi rombongan kami berlepas ke rumah Gabenor Propinsi Jambi Bapak Drs. H. Abdurrahman Sayoeti. Bapak Gabenor memberi sedikit taklimat mengenai hasratnya untuk mengadakan Seminar Kerajaan Melayu di Jambi. Selepas taklimat satu jamuan pagi disediakan.

Kami melawat Bapak Yunos yang dimasukkan ke hospital sebelum pulang ke hotel. Apabila kami sampai di hotel kami pun bersiap-siap untuk perjalanan yang jauh ke Padang di Propinsi Sumatera Barat. Kami berhenti untuk makan tengah hari di Sarolangun.

Batu Bersurat Karangberahi

Dalam perjalan ke Padang, rombongan kami berhenti untuk melawat Batu Bersurat di Desa Karangberahi. Kami terpaksa menaiki perahu untuk melintasi Sungai Merangin. Perjalanannya mendebarakan hati oleh kerana arus sungai yang deras dan tepi perahu yang kami naiki hanya satu inci di atas permukaan air.

Bapak Bupati Kabupaten Sarko

Tiba kami di Bangko, kami terus ke rumah Bupati (Kepala Daerah Tingkat II) Kabupaten (Daerah) Sarolangun-Bangko (Sarko). Bapak Bupati menyambut kedatangan rombongan kami serta menyediakan satu jamuan makan tengah hari. Ibu Bupati menghadihkan sebuah cenderamata (dihasil-



Kelihatan Prof. Nik Hassan Shuhaimi dan isteri sedang menyeberangi Sungai Merangin.

kan daripada sejenis batu yang banyak didapati di Kabupaten Sarko) untuk setiap ahli rombongan kami.

Kami meneruskan perjalanan kami ke Padang. Rombongan kami menempuhi satu peristiwa yang menggerunkan apabila salah sebuah dari van rombongan kami melanggar dua ekor kambing. Nasib kami baik kerana kami tidak dikenakan apa-apa bayaran kerana melanggar kambing-kambing tersebut.

Kami berhenti sebentar untuk minum kopi di Pulau Punjung. Di Silungkang kami juga berhenti untuk membeli-belah.

Padang

Kami selamat sampai di Padang pada jam 12.45 pagi dan terus ke tempat penginapan di Hotel Hang Tuah.

HARI KELAPAN

Pada sebelah paginya rombongan kami diberi kebebasan waktu untuk berjalan-jalan di sekeliling Padang. Rombongan kami bertemu semula dengan Encik Jazamuddin.

Muzium Negeri Propinsi Sumatera Barat (Sumber)

Pada pukul 11.00 pagi rombongan kami melawat Muzium Negeri Propinsi Sumbar "Adhityawarman" kedatangan kami disambut oleh kepada Muzium Bapak Drs. Erman Makmur. Selepas lawatan tersebut kami menghadiri jamuan makan tengah hari yang disediakan oleh Bapak Bostami di Rumah Makan Serba Nikmat.

Masjid Kampung Keling

Ibu Usria Dhavida (Ita Malik) dan Ibu Yurmanis kedua-duanya pegawai



Rombongan bergambar ramai di hadapan Muzium Negeri Propinsi Sumbar.

Muzium Adhityawarman telah membawa kami melihat beberapa tempat menarik di sekeliling Padang. Pertama sekali kami ke Kampung Keling untuk melihat Masjid Muhammadan yang merupakan salah sebuah masjid yang tertua di Padang. Masjid tersebut didirikan pada 1293 Hijrah.

Pantai Air Manis

Kami melewati Pantai Air Manis. Ciri istimewa Pantai Air Manis mempunyai "fresco" dan kapal batu yang menggambarkan cerita Malim Kundang, yang lebih kita kenali sebagai Nakhoda Tenggang di Malaysia.

Selepas mengelilingi Padang rombongan berehat pada sebelah petangnya. Waktu malamnya Bapak Boestami sekali lagi memberi kami satu jamuan, pada kali ini kami dijamu dengan Sate Laweh.

HARI KESEMBILAN

Kanwil Depdikbud Propinsi Sumbar

Selepas sarapan pagi, kami menghadiri satu taklimat dan sesi perbincangan di Kantor Wilayah (Kanwil) Departemen Pendidikan dan Kebudayaan (Depdikbud) Propinsi Sumatera Barat.

Setiap ahli rombongan kami diberi sebuah cenderamata oleh Kepala Kanwil. Selepas lawatan kami ke Kanwil Depdikbud Sumbar, kami balik ke hotel dan bersiap-siap untuk meneruskan perjalanan kami ke Padang Sidempuan. Encik Jazamuddin meninggalkan rombongan kami untuk terus ke Medan dengan kapal terbang.

Rombongan kami berhenti sebentar di luar Kota Padang untuk menikmati beberapa biji durian. Selepas itu kami juga berhenti sekali lagi di Pusat Dokumentasi dan Informasi Kebudayaan Minangkabau (PDIKM) di Padang Panjang untuk mengambil buku yang telah dipesan oleh salah seorang ahli rombongan. Kami berhenti untuk makan tengah hari di Bukit Tinggi.

Bonjol, Tempat Melintas Garisan Khatulistiwa

Rombongan kami berhenti di Bonjol untuk mengambil gambar dan membeli beberapa "souvenir" untuk mengingati pengalaman kami melintasi garisan Khatulistiwa daripada "hemisphere" Selatan ke "hemisphere" Utara.

Cagar Budaya Rimba Panti

Kami sempat berhenti sebentar untuk melihat sebuah sumber air panas di Cadar Budaya Rimba (Hutan Simpanan) Panti yang terletak di dalam perjalanan kami.

Rombongan kami meninggalkan propinsi Sumbar dan memasuki propinsi Sumatera Utara (Sumut) dan Kabupaten Tapanuli Selatan (Tapsel) pada lebih kurang 5.43 petang. Kami berhenti untuk makan malam di Kotanopan. Perjalanan kami pada hari ini berakhir apabila kami sampai di Hotel Samudera, Padang Sidempuan.

HARI KESEPULUH

Selepas sarapan pagi, rombongan kami meninggalkan Padang Sidempuan untuk meneruskan perjalanan ke Parapat. Apabila kami berhenti seketika di Desa Pargarutan, beberapa orang daripada ahli rombongan kami membeli buah salak.

Kompleks Percandian Padang Lawas

Untuk melihat kompleks percandian Padang Lawas, rombongan kami terpaksa menghala ke arah Timur untuk sampai ke Gunungtua, dan di Gunungtua kami menghala ke arah Selatan. Kami melihat Candi Bahal I dan Candi Bahal II.

Selepas lawatan tersebut, kami balik semula ke Gunungtua untuk makan tengah hari. Kami terpaksa berpatah balik mengikut jalan yang telah kami lalui untuk meneruskan perjalanan kami ke Parapat.


Apabila sampai ke Simagumban, sebelum memasuki kabupaten Tapanuli Utara, rombongan kami mengikuti jalan yang jauh sedikit melalui Tarutung dan Balige dan tidak mengikuti Jalan Raya Lintas Sumatera.

Parapat (Danau Toba)

Di Parapat, rombongan kami telah melihat beberapa hotel sebelum bersetuju untuk menginap di Hotel P.T., Danau Toba International.

HARI KESEBELAS

Selepas makan pagi, rombongan kami bertolak untuk melawat Pulau Samosir. Tuan Haji Abdul Hamid tidak mengikuti rombongan kami ke



Candi Bahal I di Padang Lawas.

Pulau Samosir. Kami menyewa sebuah “ferry”, KM Toba, untuk membawa kami pergi dan balik. Di dermaga Parapat, kami melihat beberapa orang kanak-kanak kecil berenang dan menyelam untuk mengutip wang siling yang dicampak oleh beberapa orang daripada ahli rombongan kami.

Tomok, Pulau Samosir

Tomok merupakan satu pusat membeli-belah untuk para pelancang. Gerai-gerainya kecil dan menjual barangan cenderamata buatan tampatan. Kebanyakan daripada gerai-gerai ini dijaga oleh orang-orang perempuan.

Pemugaran Makam Raja

Di atas satu kawasan yang tinggi, yang dikelilingi oleh gerai-gerai, kami melawat Pemugaran Makam Raja Op. Sori Buntu Sinabutar (Ke-410). Di sini terdapat beberapa keranda yang diperbuat daripada kepingan batu yang diukir. Selepas bersiar-siar serta membeli-belah di Tomok kami pulang semula ke Parapat, sebelum bertolak ke Berastagi.

Rumah Bolon, Simalungan

Dalam perjalanan kami ke Berastagi, rombongan kami melawat Rumah Bolon di Simalungan. Kompleks ini terdiri daripada beberapa buah rumah orang Batak yang bercorak tradisional. Rumah Bolon merupakan tempat kediaman raja-raja Batak. Rumah-rumah yang lain menjadi tempat kediaman ahli-ahli keluarga diraja.

Kampung Tradisional Linggi

Rombongan kami juga sempat melewati Linggi dimana kami melihat beberapa daripada rumah-rumah tradisional orang Batak masih digunakan oleh masyarakat di sana. Malangnya, rumah yang paling besar di Linggi sudahpun ditukarkan menjadi pasar.

Berastagi

Kami sampai di Berastagi pada sebelah petang dan menginap di Hotel Sibayak Grisyawisata. Hotel ini mempunyai sebuah kolam renang yang diisi dengan air panas. Suhu Berastagi yang dingin dengan air kolam yang panas merupakan satu kombinasi yang enak sekali.

HARI KEDUABELAS

Pada sebelah pagi rombongan kami telah diberikan masa lapang untuk aktiviti-aktiviti sendiri. Sebahagian daripada kami telah menggunakan masa ini untuk bersiar-siar di Berastagi. Harga buah-buahan di sini agak murah. Banyak buah-buahan dibeli oleh beberapa ahli rombongan.

Gunung Gundaling

Kami juga menaiki Gunung Gundaling. Di atas puncak gunung tersebut kami dapat melihat pemandangan di sekeliling. Kami juga dapat melihat Gunung Berapi Sibayak daripada puncak gunung ini. Dr. Nik Hassan Shuhaimi telah menaiki seekor kuda yang dipimpin oleh tuannya mengelilingi puncak Gunung Gundaling. Di tempat meletak kereta kami juga melihat sebuah surau yang menggunakan atap yang mirip kepada rumah tradisional orang Batak.

Setelah makan tengah hari kami bertolak daripada Berastagi, menuju ke Kotamadya Sumatera Utara (Sumut) Medan.

Medan

Di Medan, kami menginap di Hotel Garuda. Pada sebelah malam, kami bertemu semula dengan Encik Jazamuddin yang telah berpisah dengan rombongan kami di Padang untuk terbang terus ke Medan dengan tujuan untuk menguruskan hal-hal penginapan dan tiket kapal terbang kami.

HARI KETIGABELAS

Pada sebelah paginya rombongan kami sekali lagi diberi masa lapang untuk bersiar-siar.

Muzium Negeri Propinsi Sumatera Utara

Pada pukul 10 pagi, rombongan kami melawat Muzium Negeri Propinsi Sumatera Utara. Rombongan kami disambut oleh Kepala Muzium, Bapak Suruhen Purba. Babak Purba memberi taklimat mengenai muzium sebelum membawa kami melihat pameran-pameran muzium.

Kota Cina

Selepas melawat muzium, Bapak Purba membawa kami melihat Kota

Cina. Di sini kami melihat bahawa masyarakat moden sedang mendiami kawasan yang mana dibawahnya terdapat tapak proto-sejarah.

Setelah kami balik daripada Kota Cina rombongan kami telah makan tengah hari bersama Bapak Purba serta beberapa orang kakitangannya. Selepas itu Bapak Purba telah menghantar kami pulang ke hotel. Sebahagian daripada ahli rombongan kami pergi ke Pasarikan untuk "last-minute shopping".

HARI KEEMPATBELAS

Sebelah paginya kami mendapat masa lapang untuk bersiap-sedia pulang. Kami bertolak daripada Hotel Garuda jam 11.49 dan tiba di Bandarudara Polinia, Medan sepuluh minit kemudian. Di sana kami telah meninggalkan teman-teman kami yang telah mengikuti kami dari Padang dengan perasaan yang sedih.

Pesawat yang kami naiki, Simpati 022, berlepas daripada Bandarudara pada jam 2.12 petang waktu tempatan (3.12 petang waktu Malaysia). Kami mendarat di Lapangan Terbang Antarabangsa Bayan Lepas, Pulau Pinang pada jam 3.45 waktu tempatan. Perjalanan kami mengambil masa selama 33 minit.

Di Pulau Pinang rombongan kami akhirnya berpisah dengan Encik Ahmad Harun dan Tuan Hj. Abdul Hamid, yang akan mengambil kenderaan darat untuk pulang ke tempat masing-masing. Ahli-ahli rombongan yang tinggal telah pergi ke kantin kakitangan untuk makan tengah hari.

Pesawat MAS MH 1199 berlepas dari Bayan Lepas pada jam 6.43 petang dan tiba di Lapangan Terbang Antarabangsa Subang jam 7.14. Selepas mengambil beg, rombongan pun bersurai, lawatan ke Sumatera selama 14 hari ini menjadi kenangan yang sungguh menarik.